

02/11/2003

BN Sabah beri sokongan padu kepada Pak Lah

KOTA KINABALU: Parti komponen Barisan Nasional (BN) Sabah menyatakan sokongan padu kepada Datuk Seri Abdullah Ahmad Badawi sebagai Perdana Menteri baru dan berharap akan meneruskan agenda pembangunan negara dengan cemerlang.

Sambil mengucapkan tahniah atas pelantikan itu, mereka juga berharap pengganti Tun Dr Mahathir Mohamad itu membawa lebih banyak kemajuan kepada negeri ini khususnya dalam merencanakan pembangunan ekonomi.

Setiausaha BN Sabah, Datuk Karim Bujang, berkata proses peralihan kuasa yang berjalan lancar kelmarin, memberi keyakinan kepada rakyat terhadap Abdullah sebagai Perdana Menteri yang baru.

"Proses peralihan kuasa yang berjalan dengan baik ini, menjamin kemakmuran negara bagi jangka masa panjang dan membuktikan sokongan padu rakyat kepada Pak Lah," katanya.

Ketua Pemuda Parti Bersatu Sabah (PBS), Almudin Kaida, yakin pelantikan Abdullah sebagai peneraju negara yang baru akan memastikan kestabilan dan kemajuan negara berterusan.

"Sebagai pemimpin muda, kami menyokong penuh kepemimpinan Pak Lah dan berharap beliau membawa lebih banyak kemajuan kepada negara serta negeri ini," katanya.

Naib Presiden Parti Liberal Demokratik (LDP), Datuk Lee Chuen Wan, berkata rakyat Malaysia perlu memberi sokongan padu terhadap Abdullah.

"Pak Lah ialah pemimpin yang berkarisma tinggi dan kita yakin dengan pengalamannya yang luas itu, Malaysia akan bertambah maju dan makmur pada masa depan," katanya.